

UN MUSEO DI CARNAVAL LO CONTRIBUI NA TURISMO DI ARUBA

ORANJESTAD (AAN): "Aruba mester un museo di Carnaval". Asina e pintora local Julie Oduber ta bisa den un entrevista cu DIARIO.

Segun Oduber ta importante pa cuminsa cu un museo o exposicion permanente tocante Carnaval pa asina conserva e bunitesa di e periodo aki.

E ta di opinion cu Aruba ta yen di artista talentoso expresando nan mes pa medio di Carnaval.

E hendenan aki, asina e ta conta, ta dedica ora- y dianan largo riba obranan di arte Carnavalesco, esta tanto trahenan, roadpiecenan y tambe carosanan.

Sinembargo e publico ta haya poco oportunidad pa realmente goza di nan pa motibo cu ta un rato so nan ta haya nan di wak durante e parada.

Ta duel Oduber ademá pa mira cu despues di Carnaval, tur cu a wordo traha cu tanto dedicacion y creatividad ta wordo benta afo o poni den un huki di cura unda cu poco-poco e ta caba na nada.

Un ke otro ta indica e importancia di un museo cu lo, ademá di conserva e obranan, duna tanto na e publico como na e turistanan e oportunidad pa por apreciar, experiencia y disfruta di Carnaval durante henter aña.

Segun Oduber, un museo di Carnaval lo forma un atraccion importante pa nos isla pa motibo cu hopi turista ta desea y ta pidi pa mira algo di e arte, e culturay tradicion di Aruba.

Sinembargo nos isla ta brinda masha poco oportunidad pa nan por haci esaki.

E pintora ta bisa di ta discutendo e idea di un museo di Carnaval ya pa 30 aña caba cu Milo Croes, presidente di SAC.

Den su opinion ta solamente pa motibo di dehado

y no pa falta di interes o entusiasmo, e idea aki no a bira realidad ainda.

E ta envisiona e museo como un lugar espacioso unda cu por pone tanto e trahenan di mas bunita, e head-, body- y roadpiecenan di mas espectacular y tambe algun carosa.

E murayanan lo wordo decora cu potretnan riba formato di poster di por ehempel, e diferente grupo- y carosanan pa asina duna un bon impresion general di e parada di Carnaval.

Cada obra lo wordo acompaña cu un borchí riba cual ta para ta kende a trahe, cuanto ora a tume, cua grupo e ta representa y demas detayenan.

Fuera di ta otro atraccion turistico pa nos isla, un exposicion asina lo forma un incentivo pa e artistanan Carnavalesco trata di sobresali mas y mas.

Ademá e lo ta e tipo di exposicion cu tur aña atrobe lo renoba su mes.

Oduber ta bisa cu cada aña por saca cierto obranan pa traha lugar pa otro mientras tanto cu e favoritonan por keda mas largo.

Un idea di parti di DIARIO ta pa ademá traha un clase di "hall of fame" di e diferente reinanan, e prins y panchonan, e tumberonan etcetera.

Esey mes ora lo sirbi pa documenta e Carnaval, algo cu te awor aki no a sosode na di un forma structura.

Sinembargo ta importante pa capta y conserva e historia di Carnaval pa e generacionnan cu ta sigui pa motibo cu e periodo aki ta un parti esencial di nos cultura.

Mientrastanto e iniciativa di Oduber ta di apoya y ta di spera cu e museo lo por haya e sosten necesario di tanto gobierno di Aruba, e industria turistico, e diferente instancianan cultural y tambe di e gruponan di Carnaval.